

## PABLO NAAJIONEE TITOOCUARA

### *Pablo naajiosacari Titoocuara*

<sup>1</sup> Janiyari Pabloni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaarijuhua Jesuucua tiuuniaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. <sup>2</sup> Nojori tojishacari cuno rupaa, nojoriiri niishiquiaa nojori cutaraari samitianishaanutaniuhua Pueyaso muerasu nojori quiniucua, pueyaracaanu quijiacaa nojori quiniuria Pueyasota. Cunocujaari tariucuaaanu Pueyaso sequesano, jiyanoehua tarijiatej, jiya shipinishaacarijiyojua. Nojuajaari maja na naata sapojonu. <sup>3</sup> Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuaaanucujani. Naaratej, pa Jiyanoojia Pueyasoori cua jiyatequiaari na rupaa pohuatarani, pueya cua tiutiniuria nocua. <sup>4</sup> Quiarijiani, quiocuara naajiyanjia Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquiaaricuaani. Naacuajitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuara cumaquiiria quiajaniya. Nojori cuara jiiitaara quioojia maninia, shuquiriaatia quia quiniuria pueyaracaanu.

*Titora Pablo sequesano, Creta jiya tucuaatiajajinia na mishocoriquiano*

<sup>5</sup> Janiyari quia tiujiaquiaari Creta jiya tucuaatiajajiniani, quia tucuatannura cua poonijosano cureeno. Naaratej, quia sequecanunijia quia jiyatenura jiyanijianucua, Pueyaso muerasu maapue jiiitanaa quiniuria

puetunu cuno jiya tiacajiniajanaa, taa cua sequequiaari quiajanियacuajani. <sup>6</sup> Pueyaso pueya jiitariquiano cuaara quiiria maninia pueyano, sesa miyashijia, maja pueya pocuanura sesa nojuajiniji. Cuaara jiitiaara niquiriyatujua niqiuocua. Necohua cuaara quiiria Pueyaso muerasujuhuaj, maja sesa miijaca, maja tojiyashijiacajuhuaj. <sup>7</sup> Cante Pueyaso muerasu jitianani, nojuajaari Pueyasora poonijiojua. Naaratej, nojuaja cuaara quiiria maninia quijia, sesacasoo, maja tojiyashijia. Cuaara quiyaquiiria ritia juaajia, mashaasequejojua, piyojotaja. Cuaara quiyaquiiria cumaneeca panijia sesa na miishanota na masenura. <sup>8</sup> Naajuhuj, Pueyaso pueya jitianana cuaara quiiria rucoonaacua taraajeja. Cuaara quiiria maninia miijia, maninia niishiriojojua. Cuaara quiirajuhua seetanujuanaa Pueyaso rootasano tojjia, maja rimiajata maninia miijia. Cuaara quiirajuhua Pueyaso panijia cutara, tama na cuaqueyajaaja jiitiaja maninia, maja sacuaraatia casaa porocua. <sup>9</sup> Cuaara quiiria Pueyaso rupaa tojjia cutara, taa na niishitiojosaaquiaaricujani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajijihuhuj, nojuaja na naata pueya tacatonuhua Pueyasocua sesa nojori niishishanoiniji, noo pojori canapuate Pueyaso Rupaa ruuretajaca quiyacuajani.

<sup>10</sup> Naa quia sequereenijia, queraatia tojiyashijia pueya quiniuucua, canapuate juhua niishiyashijia niishitiojoquiaa najuhwana niishitiojosanocujani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatiuuquia co miatesaanura, taa Moisés niishitiojoquiaari tarijiacuajani, seetanujuanaa Pueyaso muerasu nojori quiniuria juucua. <sup>11</sup> Nojoriiri queraatia niqiuohuaraca pueya jiyajeneteya sesa na niishitiojosanota, puetunu tapueyocucatajanaa nojori juayonuujutanura. Cuno niishitiojonaa cuaara sanaajasaaria. Nojoriiri ni-

ishitiojoquiaa saaja cumaneeca nojori masenura sesa na niishitiojonuunujiniji.

<sup>12</sup> Creta jiya tucuaatiaja pueyajinijinio tamonu shimiacuuri tama na pueyajinijiaaja naa sequequiaariti: “Creta pueyari pueyaracaanu saaja sapojonuujua. Nojoriiri jiyanoehua juaajiaca juhua sayoru. Nojoriiri puera miaquenuujua. Nojoriiri taajecorijihuaaj”.

<sup>13</sup> Seetanujuanaari cuno shimiacu sequesano. Nocuaji, jiyanoehua quia nacasure nojori, nojori cuara Pueyaso tojijiaca quiiria, maninia quijiaca nojori quiniuria. <sup>14</sup> Quia rootare nojori maja na tojitianura Judiocuaca nareja najuhuana pohuatasano, naajuhuaaj, maja nojori tojiniuria pueya rootasano, canapuate Pueyaso seetanu rupaajanaa tojiyashijiaca quiyacuajani.

<sup>15</sup> Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua tiuyashijia na quiniucua, majaari quenaaja niquiriyatu casaa maninia quini nera. Na niishitijaari juhua curuutuuca, noojiano. <sup>16</sup> Nojoriiri tama na cuaqueyajaaja sequeya: “Pueyaso niishiyanjia”. Naa nojori sequesacariitij, najuhuana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanoehua soosano pueya, puera sesa na quiniucua. Nojoriiri jiyanoehua sesa, tojiyashijiacajuhuaaj. Majaari na naata quenaaja maninia miiniu.

## 2

### *Maninia niishitiojosano cutara*

<sup>1</sup> Nocuaji, pueya quia niishitiojore maninia nojori quiniuria taa pa niishitiojosaaquiaaricuajani. <sup>2</sup> Naaratej, socua saaqiapue quia niishitiojore nojori cuara quiyaqiiria miaquejoru, mashaasequejorunio.

Nojori cuaara quiiria tojishano pueya cutara, maja rerequetesano. Nojori cuaara quiiria maninia niishiriojuuaca. Cuaara quiiria maninia quiijacajuhua, na tojishacari puetunu Pueyaso niishitiojosanojuanaa, na panishacari pueyano. Nojori cuaara quiirijuhua maninia rejeretajaca taraatia na miishacari, juhuajaniya nojori sashishacari pa Jiyaniijia. <sup>3</sup> Naajuhua, socua motaja maajipohua quia niishitiojore nojori quiniuria maninia Pueyaso niquiara pueyaracaanu, maja rimiaacatujuri, maja mashaasequenujuuaca. Nojori cuaara pueyaracaanu miiria maninia tamasaca niquiara, tamasaca miiniuria juhua nojori miishanojuhuaj. <sup>4</sup> Nojori cuaara niishitiojora niyacaraca maajipohua, maninia na paniniuria neyaca, necohuanio. <sup>5</sup> Cuno jiyaniyacuaca cuaara niishitiojora narta maajipohua, maninia niishiriojuuaca nojori quiniuria, saaja neyaca panijia nojori quiniuria, maja tamonu caya panijacara. Nojori cuaara niishitiojosaariajuhuaj, maninia poonijiojuaca na tiajina nojori quiniuria, caporatujuri nojori quiniuria, neyaca tojitiajancano. Nojori cuaara naa miiria, Pueyaso Rupaa mariqui rerequetesaareeri.

<sup>6</sup> Naajuhua, mashiquiori quia niishitiojore maninia niishiriojuuaca nojori quiniuria. <sup>7</sup> Puetunu quia miishanojuanaa cuaara quiiria maninia nojori niquiara, nojori jiaatianura quiocua, juhua quiajaniya nojori quiniuriajuhuaj. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojijia quia quiniuria. Majaari puenujuua quia quiniu quia niishitiojosacari. <sup>8</sup> Maninia quia niishitiojore Pueyaso Rupaa, taa quia niishitiojosaaquiaaricujani. Naacujitij, tamasaari maja na naata ruuretanu quiniutianiya quia niishitiojosano pueya niquiara. Naa maninia quia niishitiojosacaritij, quia niishitiojosano rerequetejacaari caririquiniutianiya. Naacujitij, nojoriiri maja tari na naata pocuanu quiniutianiya sesa pajaniyajiniji. Nojoriiri

sanaajetanutaniya.

<sup>9</sup> Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiiria na camarucua panijiaca, maja riuhuanejaca. <sup>10</sup> Cuaara nohuaseyaquiiria na camarucua casami. Cuaara quiiria seetanujuaanaa maninia mijiaca, pueya niishiniuria pa Jiyanoojia Pueyaso rootasanoori jiyanhua maninia cutara. Poonitijosano pueya jaara maninia quiriquia, Pueyaso Rupaari juhua maniniushitishano quiya tamasa niquiara.

<sup>11</sup> Paacuajaari niishiyani Pueyasoori jiyanhua jiyanoojia seetanujuaanaa, Jesu cusuucua puetunu pueyacuajanaa, sesa pa miishanojiniji pa jiyanooshaanura. <sup>12</sup> Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuaj. Naajuhuj, Pueyaso jiyanooniucua pajaniya, cunoori pa shiniujiya maninia niishiriojuaca pa quiniuria mijiria pa quishacarijia, maninia mijiaca juhuaj, Pueyaso tojjiano pa paniniutia nojuaja. <sup>13</sup> Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajujuaj. Nojuacuajaari pa sequequiaari pa Pueyaso Cristoori pocua muetanutaniuhua, shacantuuca na cumaacajinia. Naacuajitij, paari shuquiriaatia sashiya pa Jyanoni. <sup>14</sup> Nojuajaari tama na cuaqueyajaaja panitiaquiaari pocuara, sesa pa jiihishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijijianaa. Naa miiquiaariiri saaja tama na pueyaraaja pa quiniuria, jiyanhua maninia miiniucua jiaatiajaca pa quiniuriajuhuaj.

<sup>15</sup> Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure.

Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereri.

### 3

#### *Maninia rootasano Pueyaso pueyara*

<sup>1</sup> Quia pueya quia niishitiojorohua jiya jiyaniijia tojijiaca nojori quiniuria, jiyaniijianucuara na jiyatesano pueya nojori tojiniuriajuhuaj. Nojori cuaara cuno pojori naacutaara jaara sequesaaare maninia casaa nojori miiniuria. <sup>2</sup> Pueya quia niishitiojore nojori cuaara pueya sesacaashijiaca quiiriajuhuaj. Nojori cuaara quiiria juhua-janiya quijiaca, maja juajjiaca. Cuaara quiiria jiyanoojiaca. Cuaara maninia niquiiria puetunu pueyajanaa, juhua socua maninia pueya nojorijiniji, maja rimiajata na miiniuria tamasa.

<sup>3</sup> Tariija, paari mariyata mosanucua quiquiaarini, Pueyaso tojiyashijiacanio. Paari juhua tashucuanu quiquiaarini, sapojosano pa quishacari. Paari sesa miiniucua jiitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatiajaca quiquiaarini sesa pa niishishanota. Paari sesa miijiaca quiquiaarini. Paari tamasa jiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiaca quiquiaarini. Paari niquitioojuaca quiyaquiquiaarini. <sup>4</sup> Naajaa, pa Jiyanoojia Pueyaso cutaraari maninia miiquiaari pajaniya. Naacuajitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusonura. <sup>5</sup> Na muerasura pa jiyatequiaariiri saaja pocua na taraajesacari, maninia miyashijia pa quishacariija. Sesa miyashijiacara na Sohuanuta pa jataniquiaariiri, na Sohuanu jeequesacari

poojia, maninia jiuujiaraca pa quiniuria. Pueyaso So-  
huanuuri pa jataniquiaa juhua quiarinio pueya pa quini-  
uria. <sup>6</sup> Pocuaji Tacuna Jesucristo miiniuucua maninia,  
Pueyasoori jiyanoehua queraatia na Sohuanu niqutio-  
quiaari pajaniya. Juhua pocua totasaareeri na Sohuanu.  
Maja shiitianiyojua quenaaja. <sup>7</sup> Naacuajitij, pa jiyatereeri  
maninia quijiaca pa quiniuria na jiyanooshacari pa-  
janiya. Naa pa jiyatequiaariiri na muerasu pa quini-  
uria, pa masenura puetunu na jiitiasanojuanaa puera,  
jiyocuaaanu na racatasano. Naaratej, paari juhuajaniya  
sashiquiaani, pa niishishacari paari pueyaracaanu quiji-  
aca quiniutianiya natani.

<sup>8</sup> Nio cua sequesanoori seetanu rupaajanaa. Nio ru-  
paata quia nacasure Pueyaso tojitiajaca puetunu quioo-  
jiatajanaa, nojori cuara niishiriojora, maninia nojori  
miiniuria pueyaracaanu. Nio rootasanoori jiyanoehua  
maninia. Maninia cutaraari puetunu pueya cumaquitia-  
jarajanaa. <sup>9</sup> Maja cutaraari quia rupuenu cuno pueya, noo  
pojori canapuate najuhuana nacojoquiaani, naajuhuj,  
noo pojori canapuate pueyaracaanu na supuetanaa sesaca  
serojoquiaa najuhuanani, juhua pueya shocotajaca nojori  
quiniuria. Naajuhuj, maja quia rupuenu noo pojori cana-  
puate juaatioquiaani, canapuate tariucuacaanu Moisés  
Rootasanoocua juayonuutaquiaacuajani. Puetunu cuno  
nojori niishishanojuanaari najuhuanaj. Majaari na naa-  
cunu nojori.

<sup>10</sup> Quia piriyojore cuno, cante Pueyaso muerasu maanu  
raquirijitiaani, capa na niishitiojosanota najuhuanaj. No-  
juaja jaara quia tojiyaquiri coteenu quia sequesacari no-  
juaja, quiocua socua na camiriohua piriyojonu. Jaara  
tojiyaquiri quiajaniya jiyacaritij, nojuaja cuara quiiriaqui  
juhua taanuusano. <sup>11</sup> Naa na tojiyaquishacari quiajaniy-  
atej, quiocua niishiri cuno pueyano tari seseree. Tama  
sesa na miishanojuaaritia juhua nocuara saquiriojotaa.

*Pablo sequesano Titora*

<sup>12</sup> Janiya jaara Artemas jiyarore quiocuani, jiyanhua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani, janiyari Tíquico jiyaronutaniya quiocuani. <sup>13</sup> Zenas, Apoloori quiocua tiuquiniutianiya. Nojori quia naacutare quia jiiitiasanota, nojori jiiitianura puetunu na panishanojuanaa nojori quianu panishacari quia quiijajiniji. Zenasri pueyacujaji tacuna pueya nequesoreena.

<sup>14</sup> Parta Pueyaso muerasu cuaara niishiiria maninia miijiaca nojori quiniuriajuhuaj, maja najuhuana quiijaca na quiniuria. Maninia cutaraari nojori naacutanura na panishano jiiitiaashijiaca.

*Naajionee puequesacari saruhuatasano*

<sup>15</sup> Puetunu cuata quiniaajanaari cua sequeya cua saruhuatanura quiajaniya. Canaara quia saruhuatate parta Pueyaso muerasujuhuaj, canapuate canaa panijiacacuajani. Pueyaso cuaara cumaquiiria puetunu nianijaniyajanaa. Cuaara naa quiiriatej. Tariucujaja Titonaa.



Quiarinio pueyaso rupaa pa jiyaniijia Jesucristojiniji  
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

